

Nacionnan lo rindi honor na Status Aparte di Aruba

ORANJESTAD(AAN)—Manera ta conoci, na Aruba ta biba 45 nacion den paz y tranquilidad formando e gran pais Aruba.

Dia 6 di Januari 86, e Comision Organizador di e festividadnan en coneccion cu Status Aparte lo presenta un manifestacion cultura grandi cu ta inclui tambe homenaje di diferente nacion na Status Aparte di Aruba.

Pa haci esaki posibel, e comision ta pidi cooperacion di personanan cu tin trajenan tipico di e siguiente paisnan y ta dispuesto pa presenta cu nan e dia di celebracion, y nan ta: España, Hulanda, Suriname, Merca, Venezuela, Colombia, Costa Rica, Brazil, China, Portugal, Israel, India, Cuba, Argentina, Mexico, Curacao, Bonaire, Saba, St. Eustatius, St. Maarten y Panama.

E personanan cu lo tuma parti na e homenaje di nacionnan lo ricibi debido entrenamiento durante ensayonan for di profesionalnan.

Nan por tuma contacto tur dia entre 1 or y 4.30 or atardi na telefon 23250 o 24465.

E mes anochi lo tin un show di carnaval y tur grupo cu ainda tin trajenan warda por tumaparti y tambe por yama e mesun numbertan di telefon ariba mencion.

E comision organizador ta spera cu cooperacion di e pueblo cu Aruba por presenta un tremendo show cu lo keda bon dilanti mundo.

Empleadonan di gobierno awor mester permiso special pa bay especialista

ORANJESTAD(AAN)—Entrante dia prome di november, tur esnan kendenan ta segura cerca Territorio Insular di Aruba pa gastonan medico, mester di un permiso special(machtiging) pa bishita un especialista of un paramedico manera fysiotherapeut of logopedista.

Esaki ta bay pa esnan cu ta P.P.K. patientnan, esta personanan cu caarchi y trahadornan di gobierno insular y nan familia, esta casa y yiuana.

Pa bishita un especialista e persona mester di un permiso special cu e por haya cerca su docter di cas.

Un especialista cu ta manda e patient pa un otro especialista tambe por duna e permiso special aki.

Ora cu e patient mester busca receta bay laboratorio, haci examinacionnan di X Ray ariba peticion di especialista, e patient mester musta e permiso special aki.

Pa un oculista, esta docter di wowo of un pediatra, docter pa mucha te cu seis aña, e patient no mester di e permiso menciona.

Den casonan di urgencia cu ta ser atendi na Eerste Hulp, naturalmente

un patient no por busca e permiso.

Pero e permiso mester ser busca despues cerca e docter di cas.

Tin casonan di empleadonan kendenan mes ta paga tur consulta remedi etc. y despues nan ta cobra gobiernu back. E personanan aki mester menciona ariba nan 'declaratie' e number di e permiso (machtiging).

E medida aki, esta cu un patient mester di un permiso special pa e bay cerca un especialista mester ser mira como un intento pa afirma e rol central cu un docter di cas tin den henter nos cuidio medico. Tambe e mester ser mira como un intento pa aumenta e efectividad y eficiencia den nos cuidio medico, segun un comunicado di gobierno ricibi ayera di servicio informativo di gobierno ariba esaki.

Tur empleado publico por haya mas informacion na nan respectivo departamento unda nan ta emplea y tambe na e seccion Centrale Ziektkosten Administratie na Gezondheidsdienst.

Patientnan kendenan ta usa carchi di gobiernu por haya mas informacion na departamento di Cuido Social na La- goenweg.

Acuerdo cu Exxon encuan to Lago ta den porta

ORANJESTAD(AAN)—Lo por yega na un acuerdo pronto cu Exxon entre e comision negociador y e compania. Esaki lo por resulta den un acuerdo awe of e siman aki ainda, segun informacionnan.

Genoil manera ta conoci a haya te cu ayera merdia 12 pa manda confirmacion cu e fondonan ta disponibel, y esaki no a sosode, di manera cu lo por cuminsa pensa tur compromiso cu Genoil a termina aki.

E posibilidad ta keda

existi sin embargo pa den futuro si no tin acuerdo cu ningun compania, cu Genoil lo por bini den consideracion atrobe, pero na e momento aki ta e grupo di Houson ta esun mas serio.

E posibilidad ta grandi cu lo por yega na un acuerdo cu e grupo di Peter Whiteford di Houson.

E grupo di Peter Whiteford a presenta nan documentonan bancario cual ta ser studia actualmente ariba nan autenticidad y tur indicacion

ta cu lo por yega na un acuerdo cu e grupo aki.

Si no logra candidato pa habri e refineria, lo mester bay over na desmantelacion, pero lo trata na yega na acuerdo cu

un di e gruponan prome pa no yega asina leeuw.

E deliberacionnan pa yega na acuerdo cu Exxon ta den direccion di posibel venta di e refineria.

E acuerdo lo bay encastra atraccion di otro industrianan pa Aruba sea Exxon directamente of via intermediacion di Exxon lo bini otro industria Aruba.

Proyecto di pesqueria y Arufish a ser aproba

ORANJESTAD(AAN)—E proyecto di pesca cu gobiernu ta trahando ariba mas di seis aña caba y cu finalmente a ser modifica pa Rhode Island University a ser aproba na Hulanda te cu gobiernu di Aruba a haya interesadonan cu kier haci uso di e proyecto.

Na Augustus e proyecto a ser treci dilanti cerca ministro de Koning pa financiamiento di 1.5 millon y e tabata di acuerdo pa e ser manda Hulanda pa aprobacion.

For di Hulanda a bini representante di un compania cu experiencia ariba pesqueria y enlatamento di pisca y a yega

asina leeuw te cu ayera Bestuurscollege a dicidi cu lo cera un acuerdo cu e compania aki Ruisvoet di Spakenburg y notifica Gabinete di Asuntonan Antillano pa pone e 1.5 millon disponibel pa e proyecto.

E siman aki representantenan di e compania lo ta na Aruba.

Aruba lo haya un boto pa pesqueria, e compania lo siña nos hendenan tacticanan di pesqueria y tambe di enlatamento di pisca.

E empresa pa enlata e piscanan lo haya nomber Arufish y esaki lo ta pa consumo local y pa exportacion.

Gobierno di Aruba lo stimula tambe fundacion di cooperativanan.

Posiblemente Sr. Ruisvoet lo ta na Aruba mañan pa papia ariba e proyecto aki ya cu tanto Aruba como Hulanda tin su condicionnan si pa uso di e placa disponibel.

Ruisvoet tambe lo hinca placa den e proyecto.

Segun Diputado Nel Oduber, e proyecto aki no solamente ta crea hopi empleo pero e lo spara nos isla hopi divisas ya cu lo no mester importa tur e productonan di lama y lo por abastecer pueblo y hotelnan pisca necesario via empresa propio di nos isla sin cu mester cumprá esakinan den exterior.

Mucha di 10 aña tambe tabata ariba boto Rosa

ORANJESTAD(AAN)—Ayera DIARIO a publica di e boto Rosa cu lo tabata tin problema ariba lama.

Informacionnan oficial cu a ricibi ayera ta cu e boto a haya problema na Boca Druif y cu ta un familia completo tabata ariba dje.

Un di e chapaletanan di e boto lo a kibra y e boto

a keda drief.

Alarma a ser bati for di un kilometer di costa cu señal di luz.

Cudarebo a sali y a rescata e familia cu tabata consisti di J.M. di 51 aña, G.M. di 10 aña, I.O.M. di 23 aña, R.M. di 24 y M.F. di 21 aña. Ayera madrugada a drenta waf na Playa getouw pa Cudarebo.